

Surat khabar: Utusan Sarawak
Hari/Tarikh: 2/11/2016
Muka surat: S4

Tajuk : Student patut bisi penemu setimbang

Student patut bisi penemu setimbang

KUCHING: Pengari student patut bisi penemu setimbang lebu ngesan tanggungjawab nyadi tuai enggau student.

Penulung Sapit Chanselor Universiti Malaysia Sarawak (UNIMAS) Profesor Dato' Dr Mohamad Kadim Suaidi madahka, penyulut ba akademik beguna amat dikena nyamin pengidup dudi hari.

"Taja pia, nyereta aktiviti ba univesiti mega patut dikemeran-ia ngambika nyadi modal mensia ke setimbang," ku iya.

Ku iya, nyereta mayuh bengkah aktiviti ba universiti ukai kebuah ngasuh studen enda

pedulika pelajar diri empu.

Ketegal nyadi pengari student sida iya patut sensitif enggau penanggul ke bisi nuntung student bukai nyengkaum nyereta mayuh bengkah aktiviti tang iya patut diasuh setimbang.

Ku Moh Kadim, sida iya patut pandai magi maya ngambika ulih ngaga pengawa diri empu enggau manah.

Iya mansutka jajku munyi nya maya pengerami Nyuaka Surat Kuasa Maduka Kunsil Pengari Studen (MPP) UNIMAS Session 2016/2017 ba Rumah Universiti, UNIMAS, Kota Samarahan kena Hari Satu ke udah.

Kadim mega nangkakan raban MPP ke baru ngambika seruran enggau naka ulih bejalaika pengawa sereta ngesan tanggungjawab nyadi pengari student.

Kelimpah ari nya ku iya, raban MPP mega patut ulih mendingka penemu orang bukai lebu bejalaika pengawa.

Ku iya, raban MPP patut ngena peluang ke diberi ngagai sida iya ngemanahka agi chara student nyadi tuai kelimpah ari mantu ngemansangka universiti.

MPP ku iya, bejalaiakan pengawa ngatur aktiviti bala student sereta ngasuh student bukai nemu isu ba endur nya empu,

menua, entarabansa nyengkaum ngemanahka agi kualiti sistem belajar ba UNIMAS.

Ku Kadim, MPP patut aktif ngatur aktiviti dikena narit bala student nyereta program ke diatur sereta bisi ati deka nambahka penemu lalu ukai ngarapka insentif ngambika deka nyereta.

Iya mega madahka, universiti sigi endang nerima ubah strktur organisasyon. MPP ke nyengkaum Exco Bejalaika Pengawa Enda Begaji nyadi siti portfolio ke dipega sida iya.

Ku Kadim, universiti nadai kala nyekat sebarang perambu ke deka dipadaha MPP enti iya

meri pemanah ngagai semua orang. Semua idea, perambu, penemu tauka kritik deka diperatika dulu seagi iya enda ngelaban Akta Universiti enggau Kolej Universiti (AUKU) 1971, Pindahan 2012 tauka sebarang undang-undang bukai ke bisi besangkut paut.

Bisi 12 iku student nerima Surat Kuasa Pengari Studen UNIMAS dikena nganti bala pengari student ke dulu ari nya laban udah ambis timpuh kena 6 Oktober.

PROFESOR Dato' Dr Mohamad Kadim Suaidi

